

欽定天文正義

欽定天文正義卷六十

霧占

蒙靈占附

露占

霜占

冰占

霧占 蒙靈占附

禮記月令仲冬行夏令氛霧冥冥鄭註霜降之氣散相亂也
爾雅地氣發天不應曰霧霧謂之晦

史記天官書若霧非霧衣冠而不濡見則其域披甲而趨

隋書天文志霧氣若晝若夜其色青黃更相掩冒乍合乍散
臣謀君逆者喪山中冬霧十日不解者欲崩之候 霧者衆

邪之氣陰來冒陽 凡白虹霧姦臣謀君擅權立威晝霧夜

明臣志得申夜霧晝明臣志不申霧終日終時君有憂色黃

小雨白言兵喪青言疾黑有暴水赤有兵喪黃言土功或有

大風 凡夜霧白虹見臣有憂晝霧白虹見君有憂 凡霧

氣不順四時、逆相交錯、微風小雨、為陰陽氣亂之象、從寅至辰、已上、周而復始、為逆者不成、積日不解、晝夜昏暗、天下欲分離、凡霧四合、有虹各見其方、隨四時色吉、非時色凶、

凡霧氣四方俱起、百步不見人名、曰晝昏、不有破國、必有滅門、

開元占、元命包曰、陰陽亂為霧、莊子曰、騰水上溢、故為霧、董仲舒曰、太平之世、霧不塞壑、京房易侯曰、甲乙有霧、疾疫丙丁有霧、旱戌己有霧、隣國有城、拔無軍、有土功、事庚辛有霧、兵壬癸有霧、為水河圖曰、山冬大霧十日以上、不除者、山崩之候也、山水脉也、運斗樞曰、四濁霧下、天下冤、天鏡曰、天雨

霧如黃土、百姓勞苦奔亡不安、名曰黃霧、兵書曰、白霧四面圍城、必有兵到城下、不出其日、抱朴子曰、白霧四面圍城、不出百日、大兵至城下、甘氏曰、霧秋以庚申辛酉日、氣色白、東行為利、客先舉兵者勝、後舉兵者敗、巫咸曰、霧夏以丙丁巳午日、赤黃氣西行、為利、客主人凶、海中占曰、霧冬以壬癸亥子日、氣青黑色南行、興軍動眾、

觀象玩占、春秋元命包曰、陰陽氣亂而為霧、霧者百邪之氣、本於地而應於天、是謂陰來冒陽、其占為臣蔽主、明小人擅權、不利於上、凡陰晦不見日月星、昏氣襲人、慘慘懷懷者、兵亂之氣也、故曰、若霧非霧、衣冠不濡、見則其邑被甲而趨、凡

霧從夜半至日中不開遂上為蒙者臣行姦政於民而君不
悟也氣從夜半至日中不解遂合為霧者君行邪政於民而
臣不諫也過日中似雨者臣強不避君也霧終日終時其國
君有憂凡霧連五日不雨不風其地有亂兵起日出而霧連
五六日以上期六十日兵起日中霧起至昏不止其地易主
者曰時日出即有霧其地大擾凡霧從四方來合於中央即
為兵起霧下色如黃土名曰黃霧天鏡曰天雨黃霧百姓奔
亡又曰黃霧四塞國亂兵起京房曰黃霧四塞天下蔽賢絕
道其災絕世兵書曰白霧四面圍城必有兵至城下不出其
日無兵不出百日兵起又曰白霧四面圍城霧不入城城不

可攻霧入城則其城必亡春三月清旦霧起再沉過三見命
曰三帝謀兵不出六十日兵起夏三月卯時霧起再沉至三
不出二百日兵起秋三月暴風甚雨朝夕見至三不出一
年兵起冬三月疾風暴雨狀如大雪至三日不出百日兵起
春乙卯日霧兵起東方夏丁卯日霧兵起南方秋辛卯日霧
兵起西方冬癸卯日霧兵起北方凡霧氣四合有虹見隨四
時色無傷有所克則凶京房易候曰甲乙日霧人疾疫丙丁
日霧有旱戊己日霧土功興軍在外則有拔城庚辛日戊
霧有兵壬癸日霧有水甘氏曰春甲乙寅卯日霧氣色青
出東行向季者客勝夏丙丁巳午日霧氣色赤出西行為
利客主人

山、四季戊己辰戌丑未日霧氣色黃出北方、利客、主人內亂
秋庚辛申酉日霧氣色白出東行、利客、先舉兵者勝、後舉者
敗、無軍在外為興兵、冬壬癸亥子日霧氣色黑出南行、利客
主人受其害、凡子日皆有霧馬馳人走四時同然、亥日有大
霧、從子卯上來、賊至邊城、急防之、戊午日戊霧起累日不解
兵起、若有兵在外為有攻戰、十月壬癸日有赤霧其地有兵
冬三月庚辛日霧不出三年、兵草滿野、四時受商之日、夜半
大霧至日中者、兵大起、近期七日、若三日內有雨即解八魁
日陰霧、兵大起、春見秋發、夏見冬發、秋見春發、冬見夏發、霧
在其軍中、則其邦君死、將軍罷、八魁日見陰陽書、凡風霧晦

冥不辨晝夜陰為陽臣制君兩軍相當有霧即日有微雨者客勝霧而不雨者主人勝霧已除而氣彌天者賊多暗明賊少亦霧如塵沾衣冠亂兵起

管窺輯要銀山常出白霧夏夕霧一至再三不出二百日兵起戊己日霧三日不止者其下必有大戰商日霧者金日也霧起夜半而大霧及日中兵大起人聚為賊近期七十日若三日有雨災解霧從外入城有賊攻城霧從內出有兵逃出于年有大霧有大水蚤蝨穀麥傷凡雨而江湖上忽有霧復暗其水不見波濤高下以霧為準霧高五尺水汎五尺霧高一丈或至三丈五丈霧至處水汎至也

蒙占

爾雅天氣下地不應曰蒙。邢昺疏郭云言蒙昧。洪範云曰蒙。鄭註云。蒙聲近蒙。詩零雨其蒙。則蒙是天氣下降地氣不應蒙闇也。

隋書天文志。凡連陰十日。晝不見日。夜不見月。亂風四起。欲雨而無雨。名曰蒙。臣謀君。故曰久陰不雨。臣謀主。

開元占釋名曰。濛日不明。濛蒙蒙然也。春秋潛潭巴曰。大濛三十日。羣猾起。抱朴子曰。若濛氣圍城。或入於城。則兵外得入。若濛氣從內出。主人出戰。孔演圖曰。猶待期則赤濛沾冠。觀象玩占。蒙者濛濛日不明也。又曰。在天為蒙。在地為霧。日

月不見為蒙前後人不相見為霧蒙霧交錯陰邪干正凡大蒙連三日羣狝起

霾占

詩邶風終風篇終風且霾

爾雅風而雨土為霾

隋書天文志凡天地四方昏濛若下塵十日五日以上或一日或一時雨不需衣而土名曰霾故曰天地霾君臣乖大旱

露占

禮記月令孟秋之月白露降季冬行秋冬令則白露蚤降
鵲冠子聖德上及太清下及太寧中及萬林則膏露下

瑞應圖甘露者神露之精也王者和風茂則降於草木食之
令人壽露色濃甘者謂之甘露王者施德惠則甘露降於草
木甘露者美露也神靈之精仁瑞之澤其凝如脂其甘如飴
一名膏露一名天酒王者德至於天和氣感則甘露降於松
栢

宋書符瑞志栢受甘露王者耆老見敬則見竹蓐受甘露

王者尊賢愛老不失細微則見

開元占元命包曰陰陽散為露曾子曰陽勝則散為露蔡氏
月令曰露者陰液也暘為露論衡曰露秋氣所生也五經通
義曰和氣津凝為露從地出

觀象玩占露不降者天氣不下施也君不恤民之應其占為
旱亦為其地有火災

霜占

易坤卦初六履霜堅冰至象曰履霜堅冰陰始凝也馴致其道至堅冰也

詩小雅正月篇正月繁霜註正月夏之四月繁多也言霜降失節不以其時也

禮記月令孟春行冬令霜降大摯季秋之月霜始降孟冬行秋令則雪霜不時

開元占考異卽曰霜者陰精冬令也四時相代以霜收殺霜之為言止也物以終也天鏡曰霜非時而殺草是時而不殺並為蟲蝗是謂大饑

觀象玩占天氣下降而為露清風薄之而成霜霜所以肅萬物消殺於當降而不降與當殺物而不殺物者政弛而慢不當降而降與不當殺物而殺者政急而殘故隕霜不殺草與隕霜殺草春秋皆書以記異在國都則戒在君相在外則戒在守土之官京房曰誅殺無辜則非時隕霜霜所以成萬物刑罰所以誅不仁刑罰妄行誅殺不當則天應之以隕霜於春於夏臣依公結私誅殺無罪則霜下在土依公結私以緩有罪則霜附木殺罰不由上則霜見風而飛此皆刑罰不法之所致也霜未見日而消以喜怒行刑罰也霜見日而不消執法堅不可犯也天陰不見星而霜臣擅誅罰也一曰晝夜

不明而隕霜。君欲行刑有疑於心而徑行之也。隕霜殺五穀。殺刑罰慘酷也。隕霜不殺草。威不行也。天鏡占霜不殺物。來年蟲蝕害五穀。大饑。霜止樹頭而不下地者。不請決罪而上下不下也。霜在草根土隙而不著木葉高處者。刑罰專施於下賤而無所伸也。霜無芒者。行刑罰而哀其人也。霜芒向下專以法繩下。霜芒旁指。以旁言刑殺人也。霜下翩翩其狀如雪者。知其所信任為邪而不以為意也。春霜人病。京房曰。春霜殺草木。是謂陰隆。君弱臣強。下不事上。夏霜君死國亡。正月霜下著物。見日不消。小人在位。君子在野。百物不實。牛馬多疫死。著樹凍損木枝。讒言傷賢臣。冬三月無霜。蟲不蟄。來年

蝗蟲螟蟣傷害五穀萬物不成人災疾地鏡曰視古屋無人
居者其瓦上獨無霜則下有寶藏軍中霜成芒角過於旗幟
之上師不可動天霜晝下刑罰妄行霜下有聲外兵來伐
管窺輯要霜者季秋始降陽氣育物陰氣殺伐霜者天地之
刑殺也

冰占

禮記月令孟冬之月水始冰 仲冬之月冰益壯 季冬之

月冰方盛水澤腹堅行夏令冰凍消釋

開元占地鏡曰水以春冰有兵其歲不成水夏冰兵將起大
饑民流秋冰下臣憂大兵起又曰水三月至八月忽有冰者
大兵喪又曰水冬不冰饑兵

觀象玩占冰者太陰之精至柔而為剛陰極而生陽也當冰
而不冰者政失之舒也未當冰而冰與當釋而不釋者政失
之急也故春秋書無冰皆為國君失政權移於下之應京房
曰夏水冰其國君疾病五穀不成有大兵水冬不冰有疾疫

春冰下大臣死民疫秋禾不成秋冰下人憂兵起

欽定天文正義卷六十一

天占考

天占考

漢孝惠帝二年天開東北廣十餘丈長二十餘丈天裂陽不足
下強絃將害上之變也其後有呂氏之禍

晉惠帝元康二年二月天西南大裂天裂陽不足

秦安二年八月庚午天中裂為二有聲如雷者三君道虧而
臣下專僭之象也是日長沙王奉帝出拒成都河間二王後
成都河間東海又迭專威命是其應也

元帝太興二年八月戊戌天鳴東南有聲如風水相薄京房易
妖占曰天有聲人主憂 三年十月壬辰天又鳴甲午止其
後王敦入石頭王師敗績

穆帝升平五年八月己卯天中裂廣三四丈有聲如雷野雉皆鳴是後哀帝荒疾海西失德皇太后臨朝太宗總萬機桓溫專權威震內外陰氣勝陽氣微

安帝隆安五年閏月癸丑天東南鳴六年九月戊子天東南鳴義熙元年八月天鳴在東南京房易傳曰萬姓勞厥妖天鳴是時安帝雖反政而兵革歲動衆庶勤勞也

梁武帝天監十三年二月庚辰朔震於西南天如裂中大同元年六月辛巳竟天有聲如風水相薄太清二年六月天裂於西北長十丈濶二丈光出如電其聲若雷十二月戊申天西北裂有光如火

陳宣帝太建十三年九月天未夜天東南有聲如風水相激三夜乃止十四年八月癸未天有聲如風水相激九月辛亥夜天東北有聲如蟲飛漸移西北

後主至德元年九月丁巳天東南有聲如蟲飛十二月戊午夜天開自西北至東南其內有青黃雜色隆隆若雷聲

隋文帝開皇二十年四月乙亥天有聲如瀉水自南而北

唐明皇天寶十四載五月天鳴聲若雷占曰人君有憂

德宗貞元二十一年八月天鳴在西北

憲宗元和十二年正月乙酉星見而雨占曰無雲而雨是謂天

泣

僖宗中和三年三月浙西天鳴若轉磨無雲而雨

宋神宗熙寧元年七月戊子丑之五刻西南雲間有聲鳴如風
水相激寢周四方主民勞兵革連歲動六年七月丙寅丑
之四刻西北方雲間有聲如磨物主百姓勞七年七月庚
子丑之三刻西北天鳴主驚憂之事

寧宗開禧元年六月壬寅天鳴有聲占人主憂驚百姓勞失
端宗景炎二年八月己巳夜天色赤

金章宗泰和三年十月甲辰申酉間天大赤夜將旦亦如之
衛紹王大安三年十月每夜初更正東西北天明如月初出經
月乃滅

宣宗興定四年正月戊辰二更天鳴有聲

元文宗至順三年八月己巳天鼓鳴於東北

順帝至正七年冬衛輝路天鼓鳴 十三年十二月庚戌懷慶

路河內縣及河南府天鼓鳴於西北 十四年衛輝路有天

光見於西方 二十四年九月癸酉夜天西北有紅光至東

而散 二十七年正月乙未絳州夜聞天鼓鳴將旦復鳴其

聲如空中戰鬪者

明太祖洪武元年八月甲戌夜京師天鳴如河傾海注 三年

八月庚辰四年八月乙酉俱天鳴 十五年二月甲戌天鼓

鳴 二十一年八月丁巳天鳴壬戌至甲子天鼓鳴晝夜不

止 二十五年九月乙酉夜二十七年三月甲寅八月戊子
夜俱天鳴 二十八年三月戊午昏刻天鳴如風水相搏至
一鼓止六月癸亥朔夜天鳴九月戊戌初鼓天鳴如瀉水自
東北而南至二鼓止 二十九年四月戊子朔東北方天鳴
宣宗宣德元年七月癸丑昏刻東南天鳴如風水相搏乙卯夜
東南天鳴如瀉水八月癸亥昏刻復鳴如之甲子天鳴如風
水相搏乙丑昏刻復如之丁卯昏刻東南天鳴戊辰昏刻復
鳴如雨陣送至自東南而西南良久乃息辛未東南復鳴聲
如萬鼓癸酉復鳴如風水相搏己卯復鳴如之九月丁酉宵
刻正東天鳴亦如之

英宗正統六年正月丁未夜天鼓鳴 七年十月丙辰夜四鼓

天鳴有聲如風水相搏自東南至西南漸息十一月丁巳朔
五鼓西南天鳴亦如之戊午夜西北天鳴有聲如瀉水己未
夜東南天鳴如之 十年三月庚寅西北天鳴如鳥羣飛

十二年九月甲午東南天鳴有聲 十四年八月丁卯東南
天鳴有聲如瀉水壬申夜西南天鳴癸酉夜東方天鳴並如
之九月壬午夜天鳴聲如瀉水息而復鳴

景帝景泰元年七月庚申夜天鳴如瀉水 二年正月庚申六
月癸酉天鳴如之

英宗天順四年八月庚午夜西方天鳴如瀉水 七年五月丙

申天鳴亦如之

憲宗成化六年二月丙戌河南魯山縣天鼓鳴四月壬戌如之

十二年十二月辛卯山西臨汾縣天鼓鳴聲如砲 十三

年四月戊戌甘肅天鼓鳴 十四年六月辛亥臨晉天鳴墮

石縣東南三十里入地三尺大如升色黑 十九年二月甲

申昏刻河南永寧縣有火光化為白氣已而天鳴如雷聲震

林谷禽獸飛走人民驚懼 二十三年四月乙酉山西代州

天鳴三次聲如雷五月乙卯天再鳴聲如砲

孝宗洪治四年十一月甲戌真定西南天鳴如鼓又若奔車

七年十二月丁巳肅州天鼓鳴 八年二月陝西天門開人

馬百萬自下而上辛酉肅州天鼓鳴乙亥復鳴四月甲戌山西太平縣十二月乙丑靖虜衛十一年七月癸卯肅州俱天鼓鳴是月癸丑南京天鳴八月壬申台州天鼓鳴十三年四月乙巳太原十四年正月壬申遼東八月乙亥大名十七年十二月丁巳朔登州俱天鼓鳴十八年十一月庚子遼東天鼓鳴起西南正西北

武宗正德元年二月壬子夜東北天鳴如風水相搏者五七次十月癸丑掖縣天鼓鳴萊州府天鼓鳴聲如雷戊午確山縣天鼓鳴二年二月乙酉萊州府天鼓鳴三年正月丁未陝西涇陽縣天鼓鳴五月乙卯秦州禮縣天鼓鳴如雷四

年四月癸酉肅州衛兩山口營天鼓鳴八月丙戌夜山東益都臨淄樂安等縣天鼓鳴自西北往東南聲如雷五年五月己卯遼東廣寧天鼓鳴次日復鳴六年正月乙亥臨洮府天鼓鳴七月戊辰遼東錦義二城七年正月己酉山東掖縣招遠縣十月甲子遼東廣寧等衛十一月癸酉夜湖廣常德府八年四月丙辰甘肅山丹衛俱天鼓鳴九年二月丁巳甘肅莊浪衛天鼓鳴五月己卯濟南濱州天鼓鳴隕石六月甲辰鳳陽府天鼓鳴十年三月辛酉遼東廣寧衛四月甲寅山東魚臺縣十一年十一月己卯萬全都司十二年二月癸亥陝西浪衛閏十二月壬申朔山東曹州十三年正月

丙午湖廣竹谿縣己未四川鄰水縣二月癸酉蒲河中左所
十一月戊申遼東及海州蓋州二衛十五年四月丙戌鞏昌
十一月庚午崇明俱天鼓鳴十六年五月癸酉遼東天鼓
鳴者三六月戊子貴州思州府天鼓鳴良久方息

世宗嘉靖二年八月乙巳遼東廣寧衛天鼓鳴三年正月丙

子洛陽鄆師新安等縣天鼓鳴五年十月乙丑夜澄邁天

鼓鳴自北至於西南十一年五月壬子郟城天鼓鳴如雷

火光落地十二年五月山西祁縣亦如之九月甘肅鎮夷千

戶所天鼓鳴聲如雷十三年五月辛巳大同府朔應二州

十四年七月丁亥交城俱天鼓鳴九月戊子開封白晝天鼓

鳴 十九年五月辛丑曩強午時天鼓鳴 二十年六月癸未大同天鼓鳴 二十一年正月壬午朔紹興天裂有光如電五月辛巳朔甘肅十一月甲寅交城二十二年十月己卯甘肅二十五年八月庚寅甘肅俱天鼓鳴 二十七年六月惠州天鼓鳴七月又鳴 二十八年六月己亥朔惠州天方暝有聲自東方如鼓火光燭地須臾而滅七月甲戌復有聲於東北 三十五年四月辛丑甘肅天鼓鳴八月辛亥肅州衛三十八年八月丁巳陝西山丹衛四十年六月壬申蘭州莊浪四十一年正月庚子真定俱天鼓鳴

穆宗隆慶元年十二月甘肅天鼓鳴從西南起往東北止 二

年三月新城天鼓鳴者三懷慶府亦如之甲寅西寧衛天鼓
鳴八月甲辰絳州西北天裂自丑至寅乃合十一月丁未太
原府天鼓鳴三年十二月庚子天鼓鳴四年十一月丁
卯遼東天鼓鳴五年十月丁未鞏昌天鼓鳴者三十一月
庚午京師天鼓鳴十二月杭州天鼓鳴者三二

神宗萬歷三年五月癸亥景州白晝天鼓鳴者三五年十月

乙巳天鼓大鳴陰雲慘黯者移時十三年四月壬子萬全

都司天鼓鳴如雷七月辛巳沈邱天鼓鳴十五年三月戊

午平涼九月甲午涼州俱天鼓鳴十六年九月乙丑哥嵐

天鼓鳴三日甘肅石灰溝天鳴雲中如犬狀亂吠有聲十

七年正月癸亥萬全都司天鼓鳴六月辛巳石峽水泉堡天鼓鳴聲如雷九月戊午萬載縣天鼓鳴有黑烟騰起隕石

十八年四月壬申朔陝西固原州天鼓鳴丙申宣府天鼓鳴五月甲辰復鳴十九年四月辛酉遵化縣天鼓鳴如砲五月己丑甘肅鎮城天鼓鳴六月壬寅陽和城甲寅左雲衛十月己未易州俱天鼓鳴十一月癸酉倚氏縣天鼓鳴白氣凝聚丁丑甘肅山丹洪水等處天鼓鳴二十一年四月己丑館陶縣十月戊戌陝西二十二年四月壬子館陶縣戊午鎮夷所俱天鼓鳴六月丙辰臨汾襄陵翼城同時天鼓鳴肅州衛天鼓鳴乙丑西寧天鼓鳴九月辛巳又鳴三日二十五

年正月二十日夜萬全都司天鼓鳴八月甲申松山二十七

年二月壬子河南四月丙辰廣寧俱天鼓鳴 三十二年十

月戊辰四川華陽縣天鼓大鳴似雷非雷 三十三年十一

月泰州天鳴累日聲如怒濤鎮江至宜興天鳴如泰州 三

十四年八月癸丑泰州天鼓連鳴六日 三十五年十月庚

申朔西安天鼓三鳴戊辰咸寧長安二縣天鳴癸亥揚州等

處天鳴 三十六年三月庚寅寧夏天鼓鳴八月戊寅昏刻

南京西南天鳴聲如瀉水已卯南京東南天鳴隆隆有聲庚

辰南京西南天再鳴聲如瀉水 三十七年五月辛丑金州

天鼓鳴九月庚辰留都天西南有聲累日 三十九年三月

壬子天鼓鳴七月丙寅遼東天鳴 四十年六月丁丑蒲州
天有聲如雷 四十一年七月癸酉寧夏鎮十一月己卯定
襄縣四十四年正月丁丑揚州及紫荆關戊戌陝西洮州俱
天鼓鳴 四十五年八月宣府天鳴 四十六年江北天鳴
又祖陵天鳴地震 四十七年二月二十日京畿天晝赤有
光射人如血

熹宗天啓二年七月丙辰山西清源縣天鼓鳴 三年三月乙
巳薊鎮天鼓鳴 五年正月常州天鼓鳴六七月及六年正
月七年正月並如之

愍帝崇禎元年三月辛巳昧爽天赤如血射憲牖皆紅巳時漸

黃日始出 九年四月辛卯當塗天鼓鳴自西南向東北去
十年三月陝西天鼓鳴九月每晨夕天色赤黃 十二年
二月朔保寧天鼓鳴十七日易州白石口南城有聲自北至
南次日從東北起至西南如雷又似桴鼓聲 十四年二月
偏頭關天鼓鳴

天雨異物考

春秋文公三年秋雨蝻于宋公羊傳雨蝻者何墜而死也穀梁
傳著於上見於下謂之雨

顯王三年雨金於櫟陽

赧王三十一年齊千乘博昌之間方數百里雨血沾衣時燕昭

王伐齊齊湣王出奔為楚將淖齒所弑

漢惠帝二年天雨血於宜陽一頃所

元帝永光二年天雨草

成帝鴻嘉四年秋雨魚於信都長五寸以下

哀帝建平四年四月山陽湖陵雨血廣三尺長五尺大者如錢

小者如麻子

平帝元始元年正月天雨草

後漢桓帝建和三年秋七月北地廉雨肉似羊肋或大如手

晉武帝泰始八年五月蜀地雨白毛此白祥也時益州刺史王

甫晏伐汶山湖從事何旅固諫不從牙門張弘等因衆之怨

誣妄謀逆害之京房易傳曰前樂後憂厥妖天雨羽又曰邪人進賢人逃天雨毛其易妖曰天雨羽毛青人出走

惠帝永康元年尉氏雨血夫政刑舒緩則有常燠赤祥之妖
愍帝建興元年河東地震雨肉

劉聰偽建元元年雨血於東宮延明殿徹瓦在地者深五寸又
雨血平陽廣袤十里平陽地震其崇明觀陷為池水赤如血
赤氣至天有赤龍奮迅而去流星起於牽牛入紫微龍形委
蛇其光照地落於平陽北十里視之則肉臭聞於平陽長三
十步廣二十七步肉旁常有哭聲晝夜不止

梁武帝大同元年天雨土二年天雨灰其色黃

簡文帝大寶元年天雨黃沙

後齊武成河清二年太原雨血

後周宣帝大象二年正月天雨黃土

隋文帝開皇二年京師雨土 六年七月京師雨毛如髮尾長

者三尺餘短者六七寸京房易飛候曰天雨毛其國大饑時
關中旱米粟踴貴 十二年空中有物闢而墜如羝羊

唐高祖武德初突厥雨血三日

太宗貞觀七年三月雨土

高宗永徽三年三月雨土

武后垂拱三年廣州雨金 四年雨桂子於台州旬餘乃止

占曰天雨草木人多死

中宗神龍二年越州雨毛

景龍元年六月十二月雨土

明皇天寶十三年二月雨土

代宗大歷七年十二月雨土

德宗貞元二年四月雨土

四年雨木於陳留十里許大如指

長寸餘中空所下立如植是歲大雨有物墜地如猪八年

二月雨土二十一年正月甲戌雨赤雪於京師

文宗開成元年七月雨土

懿宗咸通十四年三月雨土

僖宗乾符二年洛陽因暴雨有物墜地如羝羊中和二年五

月雨土 光啓二年揚州雨魚

昭宗天復三年二月天祐元年閏四月俱雨土

宋太宗淳化三年正月京師雨土

神宗熙寧元年三月丁酉潭州雨毛 八年五月丁丑雨黃土

兼細毛 元豐三年六月乙未饒州長山雨木子數畝類山

芋子味香而辛土人以為桂子又曰菩提子明道中嘗有之

是歲大稔 五年三月己巳六年四月辛未俱雨土

哲宗元祐七年正月天雨塵土主民勞苦

徽宗宣和元年三月雨土

高宗紹興二十六年七月雨水銀

欽定天文正義卷六十二

地占考

地占考

地震

周幽王二年周三川皆震劉向以為金木水火沴土者也伯陽
甫曰周將亡矣天地之氣不過其序若過其序民之亂也陽
伏而不能出陰迫而不能升於是有地震今三川實震是陽
失其所而填陰也陽失而在陰原必塞原塞國必亡夫水土
演而民用也土無所演而民乏財用不亡何待昔伊維竭而
夏亡河竭而商亡今周德如二代之季其原又塞塞必竭川
竭山必崩夫國必依山川山崩川竭亡之徵也若國亡不過
十年數之紀也是歲三川竭岐山崩劉向以為陽失在陰者

謂火氣來煎枯水故川竭也山川連體下竭上崩事孰然也
春秋文公九年九月癸酉地震京房易傳曰臣事雖正專必震
其震於水則波於木則搖於屋則瓦落大經在辟而易臣茲
謂陰動厥震搖政宮大經搖政茲謂不陰厥震搖山山出湧
水溺子無德專祿茲謂不順厥震動丘陵湧水出

襄公十六年五月甲子地震劉向以為先是難澤之會諸侯盟
大夫又盟是歲三月諸侯為漢梁之會而大夫獨相與盟五
月地震矣

昭公十九年五月己卯地震 二十三年八月乙未地震
哀公三年四月甲午地震

秦始皇十五年地動 十七年地動自樂徐以西至平餘臺屋

墻垣大半壞

漢惠帝二年正月地震隴西壓四百餘家

文帝五年二月地震

景帝後元年五月地震

武帝元光四年五月地震 征和二年八月癸亥地震壓殺人

後元元年秋七月地震

宣帝本始四年四月壬寅地震河南以東四十九郡北海琅邪

壞祖宗廟城郭殺六十餘人 地節二年九月壬申地震

元帝初元二年二月戊午地震隴西郡 永光三年冬地震

成帝綏和二年九月丙辰地震自京師至北邊郡國三十餘壞

城郭

王莽天鳳三年二月乙酉地震

後漢光武建武二十二年九月郡國四十二地震南陽尤甚地
裂壓殺人其後武谿蠻夷反為寇害至南郡發荊州諸郡兵
遣武威將軍劉尚擊之為夷所圍復發兵赴之尚遂為所沒
和帝永元四年六月丙辰郡國十三地震春秋漢含孳曰女主
盛臣制命則地動圻畔震起山崩淪五年二月戊午隴西
地震先儒說民安土者也將大動行大震九月勾奴單于於
除難鞬叛遣使發邊郡兵討之七年九月癸卯京都地震

九年三月庚辰隴西地震閏月塞外羌犯塞殺畧吏民使
征西將軍劉尚擊之

安帝永初元年郡國十八地震 二年郡國十二地震 三年
十二月辛酉郡國九地震 四年三月癸巳郡國四地震
五年正月丙戌郡國十地震 七年正月壬寅二月丙午郡
國十八地震 元初元年郡國十五地震 二年十一月庚
申郡國十地震 三年二月郡國十地震十一月癸卯郡國
九地震 四年郡國十三地震 五年郡國十四地震 六
年二月乙巳京都郡國四十二地震或地坼裂涌水壞敗城
郭民室屋壓人冬郡國八地震 永寧元年郡國二十三地

震 建光元年九月己丑郡國三十五地震或地坼裂壞城郭室屋壓殺人 延光元年七月癸卯京都郡國十三地震三月戊申郡國二十七地震 二年京都郡國三十二地震三年京都郡國二十三地震 四年十月丁巳京都郡國十六地震

順帝永建三年正月丙子京都漢陽地震漢陽屋壞殺人地坼涌水出 陽嘉二年四月己亥京都地震 四年十二月甲寅京都地震 永和二年四月庚申京都地震十一月丁卯京都地震是時太尉王龔以中常侍張昉等專弄國權欲奏誅之時龔宗親有以楊震行事諫之止云 三年二月乙亥

京都金城隴西地震裂城郭室屋多壞墜殺人閏月己酉京
都地震十月丙戌二千餘騎入金城塞為涼州害 四年三
月乙亥京都地震 五年二月戊申京都地震 建康元年
正月涼州都郡六地震從去年九月以來至四月凡百八十
日震山谷圯裂壞敗城寺傷害人物三月護羌校尉趙冲為
叛胡所殺九月丙午京都地震

桓帝建和元年四月庚寅京都地震九月丁卯京都地震 三
年九月己卯地震庚寅又震 元嘉元年十一月辛巳京都
地震 二年正月丙辰京都地震十月乙亥京都地震 永
興二年二月癸卯京都地震 永壽二年十二月京都地震

延熹四年京都右扶風涼州地震 五年五月乙亥京都

地震 八年九月丁未京都地震

靈帝建寧四年二月癸卯地震 熹平二年六月地震 六年

十月辛丑地震 光和元年二月辛未地震四月丙辰地震

二年三月京兆地震 三年自秋至明年春酒泉表氏地

八十餘動涌水出城中官寺民舍皆傾縣易處更築城郭

獻帝初平二年六月丙戌地震 興平元年六月丁丑地震

後主炎興元年蜀地震

魏明帝青龍二年十一月京都地震從東來隱隱有聲搖屋瓦

景初元年六月戊申京都地震是秋吳將朱然圍江夏荆

州刺史胡質擊退之又公孫淵叛自立為燕王改元置百官
明年討平之

齊王正始二年十一月南安郡地震 三年七月甲申南安郡
地震十二月魏郡地震 六年二月丁卯南安郡地震

吳孫權黃武四年江東地震連震時權受魏爵命為大將軍吳王
而改元專制不脩臣述京房易傳曰臣事雖正專必震劉向
云臣下強盛將動而為害之應也 嘉禾六年五月江東地

震 赤烏二年正月地震時呂一專事步騭上疏以為臣下
專政之應 十一年二月江東地仍震時權聽讒尋黜朱

據廢太子

晉武帝泰始五年四月辛酉地震是年冬新平氐羗叛明年孫

皓遣大衆入渦口。七年六月丙申地震。咸寧二年八月
庚辰河南河東平陽地震。四年六月丁未陰平廣武地震
甲子又震。太康二年二月庚申淮南丹陽地震。五年三
月朔壬辰京師地震。六年七月己丑地震。七年七月南
安犍為地震。七月陰平地震。八月丹陽地震。九年正月會
稽丹陽吳興地震。四月辛酉長沙南海等郡國八地震。七月
至於八月地又四震。其三有聲如雷。九月臨賀地震。十二月
又震。十年十二月己亥丹陽地震。太熙元年正月地震。
惠帝元康元年十二月辛酉京師地震。四年二月上谷上庸

遼東地震五月蜀郡山移淮南壽春洪水出山崩地陷壞城
府八月上谷地震水出殺百餘人十月京都地震十一月榮
陽襄城汝陰梁國南陽地皆震十二月京都又震六年正
月丁丑地震八年正月庚辰地震泰安元年十二月地
震二年十二月庚辰地震

孝懷帝永嘉三年十月荆襄二州地震四年四月兗州地震
五月石勒寇汲郡執太守胡寵遂南濟河是其應也

愍帝建興二年四月甲辰地震三年六月丁卯長安地震

元帝太興元年四月西平地震湧出水十二月廬陵豫章武昌
西陵地震涌水出山崩二年五月己丑祁山地震山崩殺

人是時相國南陽王保在初山稱晉王不終之象也 三年

四月庚寅丹陽吳郡晉陵地震

成帝咸和二年二月江陵地震三月益州地震四月己未豫州

地震是年蘇峻作亂 九年三月丁酉會稽地震

穆帝永和元年六月癸亥地震 二年十二月地震 三年正

月庚辰地震九月又地震 四年十月己未地震 五年正

月庚寅地震 九年八月丁酉京都地震有聲如雷 十年

正月丁卯地震聲如雷雞雉皆鳴响 十一年四月乙酉地

震五月丁未地震 升平二年十一月辛酉地震 五年八

月涼州地震

哀帝隆和元年四月甲戌地震 興寧元年四月甲戌揚州地

震湖濱溢 二年三月庚寅江陵地震

海西公太和元年二月涼州地震水涌

簡文帝咸安二年十月辛未安成地震

孝武帝寧康元年十月辛未地震 二年二月丁巳地震七月

甲午涼州地震山崩 太元二年閏三月壬午地震五月丁

丑地震 十一年六月己卯地震是後緣河諸將連歲兵役

人勞之應也 十五年三月己酉朔夜地震八月京都地震

十二月己未地震 十七年六月癸卯地震十二月己未地

又震 十八年正月癸亥朔地震二月乙未夜地震

安帝隆安四年四月乙未九月癸丑地震 義熙四年正月壬

子夜地震有聲十月癸亥地震 五年正月戊戌夜尋陽地

震有聲如雷明年盧循下 八年自正月至四月南康廬陵

地四震明年王旅西討荆益 十年三月戊寅地震

宋武帝永初元年秋七月己巳地震

文帝元嘉十二年夏四月都下地震 十五年七月辛未地震

孝武大明二年四月辛丑地震 六年七月甲申地震有聲如

雷兗州尤甚魯郡山搖者二

後廢帝元徽五年五月地震

齊東昏侯永元元年七月地震至來歲晝夜不止小屋多壞

梁武帝天監五年十二月京師地震京房易飛候曰地動以下

十一月者其邑饑亡時交州刺史李凱反明年霜歲儉人饑

普通三年正月建康地震時義州刺史文僧朗以州叛

六年十二月地震京房易飛候曰地冬動有音以十二月者

其邑有行兵是時帝令豫章王琮將兵北伐建中大通五

年正月建康地震京房易飛候曰地以春動歲不昌是歲大

水百姓饑饉大同三年十一月建康地震京房飛候曰地

震以十一月邑有大喪及饑亡明年霜為災百姓饑五年

十月建康地震是歲會稽山賊起七年二月建康地震是

歲交州人李賁舉兵逐刺史蕭諮 中大同元年閏正月地

震 太清三年四月建康地再震

陳武帝永定二年五月建康地震

宣帝太建四年十一月地震陳實應反閩中

後主禎明元年正月地震施文慶沈客卿專恣之應也

後齊武成河清二年并州地震和士開專恣之應

後周武帝建德二年涼州地頻震城郭多壞時羗夷叛

隋文帝開皇十四年五月京師地震京房易飛候曰地動以夏

五月、人流亡是歲關中饑百姓就糧於關東 二十年十一

月戊子、天下地震 仁壽二年四月岐雍地震易飛候曰震

以四月五穀不熟、人大饑

唐高祖武德二年十月乙未京師地震 七年七月雋州地震

山摧壅江水壅流

太宗貞觀七年十月乙丑京師地震 十二年正月壬寅松叢

二州地震壞廬舍 二十年九月辛亥靈州地震有聲如雷

二十三年八月癸酉朔河東地震晉州尤甚壓殺五十餘人乙亥又震十一月乙丑又震

高宗永徽元年四月己巳朔晉州地震己卯又震六月庚辰又

震有聲如雷 二年十月地震十一月戊寅定襄地震 儀

鳳二年三月庚辰京師地震 永淳元年十月甲子京師地

震

武后垂拱三年十月乙亥京師地震 四年七月戊午又震八

月戊戌神都地震 延載元年四月壬戌常州地震

中宗景龍四年五月丁丑剡縣地震

睿宗景雲三年正月甲戌并汾絳三州地震壞廬舍壓死百餘人

明皇開元二十二年二月壬寅秦州地震西北隱隱有聲拆而復合經時不止壞廬舍殆盡壓死四千餘人 二十六年三月

癸巳京師地震

肅宗至德元載十一月辛亥朔河西地震裂有聲陷廬舍張掖酒泉尤甚至二載三月癸亥乃止

代宗大歷二年十二月壬申京師地震自東北來有聲如雷者
三 三年五月丙戌又震 十二年恒定二州地大震三日
乃止京鹿寧晉地裂數丈沙石隨水流出平地壞廬舍壓死
數百人

德宗建中元年四月己亥京師地震五月辛巳又震 貞元二
年五月己酉又震 三年十一月丁丑夜京師東都蒲陝地
震 四年正月庚戌朔夜京師地震辛亥壬子丁卯戊辰庚
午癸酉甲戌乙亥皆震金房二州尤甚江溢山裂屋宇多壞
人皆露處二月壬午京師又震甲申乙酉丙申三月甲寅己
未庚午辛未五月丙寅丁卯皆震八月甲午又震有聲如雷

甲辰又震 九年四月辛酉又震有聲如雷河中閭輔尤甚
壞城壁廡舍地裂水涌 十年四月戊申京師地震癸丑又
震侍中渾瑊第有樹湧出樹枝皆戴蚯蚓 十三年七月乙
未又震

憲宗元和七年八月京師地震草樹皆搖 九年三月丙辰雋
州地震晝夜八十墜死百餘人地陷者二十里 十年十月
京師地震 十一年二月丁丑又震 十五年正月戊辰夜
地震

文宗太和二年正月壬申地震 七年六月甲戌又震 九年
三月乙卯京師地震屋瓦皆墜戶牖間有聲 開成元年二

月乙亥又震 二年十一月乙丑夜又震 四年十一月甲

戌又震

武宗會昌二年正月癸亥宋毫二州地震十二月癸未京師地

震

宣宗大中二年十月辛巳上都及振武河西天德靈武蘆夏等

州地震壞廬舍壓死數十人 十二年八月丁巳太原地震

懿宗咸通元年五月上都地震 六年十二月晉絳二州地震

壞廬舍地裂泉湧泥出青色 八年正月丁未河中晉絳三

州地大震壞廬舍人有死者 十三年四月庚子朔浙東西

地震

僖宗乾符三年六月乙丑雄州地震至七月辛巳止州城廬舍盡壞地陷水涌傷死甚衆是月濮州地震十二月京師地震有聲四年六月庚寅雄州地震六年二月京師地震有聲如雷藍田山裂水涌中和三年秋晉州地震有聲如雷光啟二年春城都地震月中十數占曰兵饑十二月魏州

地震

昭宗乾寧二年三月庚午河東地震

宋太祖乾德三年京師地震

太宗至道二年十月潼關西至靈夏環慶等州地震郭慮舍多壞占云兵饑是時西戎寇靈州明年遣將率兵援糧以救之

關西民有饑殍者

真宗咸平二年九月常州地震壞鼓角樓羅務軍民廬舍甚衆

四年九月慶州地震者再 六年正月益州地震 景德

元年正月丙申夜京師地震癸卯夜復震丁未夜又震屋宇
皆動有聲移時方止癸丑冀州地震占主土工興有急令兵

草興是年契丹犯塞二月益黎雅州地震三月邢州地震不

止四月己卯夜瀘州地震五月邢州地復震不止十一月壬

子日南至京師地震癸丑石州地震 四年七月丙戌益州

地震己丑渭州瓦亭寨地震者四 大中祥符二年三月代

州地震 四年六月昌眉州並地震七月真定府震壞城壘

仁宗天聖五年三月戊辰秦州地震 七年十月丙午京師地

震 景祐四年十二月甲申忻代并三州地震壞廬舍覆壓

吏民 寶元元年正月庚申并忻代州地震十一月忻州地

震十二月甲子京師地震 慶歷三年五月乙亥忻州地大

震說者曰地道貴靜今數震搖兵興民勞之象也五月庚午

忻州地震西北有聲如雷 五年七月丁酉廣州地震己卯

京南岳州並地震 六年二月戊寅青州地震三月庚寅登

州地震岨嵎山摧折是震不已每震即海底有聲如雷五月

甲申京師地震 七年十月乙丑河陽許州地震 皇祐二

年十一月丁酉夜秀州地震有聲自南北起如雷 嘉祐二

年雄霸等州地震 五年五月己丑京師地震

英宗治平四年秋漳泉建州邵武興化軍等處皆地震潮州尤甚地裂泉湧壓覆州郭及兩縣屋宇土民軍兵死者甚衆八月己巳京師地震

神宗熙寧元年七月甲申地震乙酉辛卯再震八月壬寅甲辰又震是月鄆州瀆城東阿二縣地震終日滄州清池莫州亦震壞官私廬舍城壁是時河北復大震或數刻不止有聲如雷樓櫓民居多摧覆壓死者甚衆九月戊子莫州地震有聲如雷十一月乙未京師及莫州地震十二月癸卯瀛州地大震丁巳冀州地震辛酉滄州地震涌出沙泥船板胡桃螺蚌

甲之屬十二月朔州地再震是歲數路地震有一日十數震
有踰半年震不止者 元豐八年五月京師地震

哲宗元祐二年二月辛亥代州地震有聲 四年春陝西河北
震 七年九月己酉蘭州鎮戎軍永興軍言地震十月庚戌
朔環州地再震 紹聖元年十一月丙寅太原府地震 二
年十月十一月河南府地震是歲蘇州自夏至秋地震 三

年三月戊戌夜劍南東川地震九月己酉滁州沂州地震

四年六月己酉太原府地震有聲 元符元年七月壬申夜

雲霧蔽天地震良久 二年正月壬申恩州地震八月甲戌

太原府地震 三年五月己巳太原府又震

徽宗建中靖國元年十二月辛亥太原府潞晉臨代石嵐等州
奇嵐威勝保化寧化軍地震彌旬晝夜不止壞城壁屋宇人
畜多死 宣和四年北方用兵雄州地大震 六年正月京
師連日再震宮殿門皆動有聲

高宗建炎二年正月戊戌長安地大震金將婁宿園城彌旬無
外援兵乘地震而入城遂陷 紹興三年八月甲申地震平
江府湖州尤甚 六年六月乙巳夜地震有聲自西北如雷
餘杭縣為甚 二十四年正月戊寅地震 二十五年三月
壬申又震 二十八年八月甲寅地夜雷震 三十一年三
月壬辰又震 三十二年七月戊申又震

孝宗隆興元年十月丁丑地震 二年六月甲寅又震 乾道

二年九月丙午地震自西北方是月台州有海寇 四年十

二月壬子石泉軍地震三日有聲如雷屋瓦皆落 淳熙元

年十二月戊辰地震自東北方後湖南江西茶寇擾數路

九年十二月壬寅地震 十年十二月丙寅又震 十二

年五月庚寅又震

寧宗慶元六年十一月甲子地震東北方 嘉定六年四月行

都地震六月丙子嚴州淳安縣地震 十年二月庚申地震

自東南越月金犯光州 十四年正月乙未地夜震大雷是

春金入寇 蕲黃州失守

山崩 地陷 地移 地長 川竭

春秋釐公十四年秋八月辛卯沙麓崩

成公五年夏梁山崩

漢高后二年正月武都山崩殺七百六十人地震至八月廼止
文帝二年四月齊楚地山二十九所同日俱大發水漬出劉向
以為近水沴土也

成帝河平三年二月丙戌捷為栢江山崩捐江山崩皆震江水
江水逆流壞城殺十三人地震積二十一日百二十四動

元延三年正月丙寅蜀郡岷山崩震江水水逆流三日廼通
劉向以為周時岐山崩三川竭而幽王亡岐者周所興也漢

家本起於蜀漢今所起之地山崩川竭星孛又及攝提大角從參至辰殆必亡矣

王莽天鳳三年長平館西岸崩廩涇水不流毀而北行

後漢和帝永元元年七月會稽南山崩會稽南山崩方大名山

也 七年七月趙國易陽地裂京房易傳曰地裂者臣下分

離不肯相從也是時南單于衆乖離漢軍追討 十二年夏

四月戊辰南郡秣歸山高四百丈崩填豁殺百餘人明年冬

至蠻夷反遣使募荊州吏民萬餘人擊之 元興元年五月

癸酉右扶風雍地裂是後西羌大寇涼州

鴻帝延平元年五月壬辰河東恒山崩

安帝永初元年六月丁巳河東楊地陷東西百四十步南北百二十步深三丈五尺 六年六月壬辰豫章員谿原山崩各六十三所 元初元年三月己卯日南地坼長百八十二里 其後三年正月蒼梧鬱林合浦盜賊羣起劫畧民吏 二年六月河南雒陽新城地裂 延光二年七月丹陽山崩四十所 三年六月庚午巴郡閬中山崩 四年十月丙午蜀郡越嶲山崩殺四百餘人

順帝陽嘉二年六月丁丑雒陽宣德亭地坼長八十五丈近郊時李固對策以為陰類專恣將有分離之象所以附郊城者是上帝示象以誠陛下也

桓帝建和三年四月郡國六地裂水湧出井溢壞寺屋殺人

永興二年六月東海胸山崩冬十二月泰山琅邪盜賊羣起

永壽二年七月河東地裂 延熹元年七月乙巳左馮翊

雲陽地裂 三年五月戊申漢中山崩是時上寵恣中常侍

單超等 四年六月庚午泰山博尤來山判解 八年六月

丙辰維氏地裂 永康元年五月丙午雒陽高平永壽亭上

黨、法氏地各裂

靈帝建寧四年五月河東地裂十二處裂各長十里百七十步

廣者三十餘步深不見底

魏元帝咸熙二年二月太行山崩此魏亡之徵也其冬晉有天

下

吳孫權赤烏十三年八月丹陽句容及故部寧國諸山崩鴻水溢劉歆以為國主山川山崩川竭亡之徵也吳雖稱帝其實列國災發丹陽天意見之後二年而權薨又二十六年而吳亡

晉武帝泰始三年三月戊午太石山崩四年七月泰山崩墜三星 太康五年庚午宣帝廟地陷 六年十月南安新興山崩湧水出 七年二月朱提之大瀘山崩震壞郡舍陰平之仇池崖陷 八年七月大雨殿前地陷方五尺深數丈中有破船

惠帝元康四年蜀郡山崩殺人五月壬子壽春山崩洪水出城
壞地陷方三十丈殺人六月壽春大雷山崩地坼人家陷死
上庸郡亦如之八月居庸地裂廣三十六丈長八十四丈水
出大饑上庸四處山崩地墜廣三十丈長一百三十丈水出
殺人 太安元年四月西壩崩

懷帝永嘉元年三月洛陽東北步廣里地陷 二年八月己亥
鄧城城無故自壞七十餘丈司馬越惡之遷於濮陽此見沴
之異也越卒以陵上受禍 三年七月戊辰當陽地裂三所
廣三丈長三百餘步京房易傳曰地坼裂者臣下分離不肯
相從也其後司馬越苟晞交惡四方牧伯莫不離散王室遂

亡

元帝大興元年二月廬陵豫章武昌西陽地震山崩二年五

月祁山地震山崩殺人三年南平郡山崩出雄黃數千斤

四年八月常山崩水出潯沱盈溢大木傾拔

成帝咸和四年十月柴桑廬山西北崖崩十二月劉胤為郭默

所殺

穆帝升平五年二月南掖門馬足陷地得鐘一有文四字

哀帝隆和元年四月丁丑浩亶山崩張天錫亡徵也

安帝熙義八年三月壬寅山陰地陷方四丈有聲如雷十年

五月戊寅西明門地穿涌水出毀門扇及陷此水沴土也

十一年五月霍山崩出銅鐘六枚 十三年七月漢中城固縣水涯有聲若雷既而岸崩出銅鐘十有二枚

梁武帝普通二年始平郡石鼓村地自開成井方六丈六寸深三十二丈

後魏孝靜帝武定二年十一月西河地陷有火出後周武帝建德二年涼州地震裂出泉

隋文帝仁壽三年梁州就谷山崩

煬帝大業七年砥柱山崩壅河逆流數十里

唐太宗貞觀八年七月隴石山摧山者高峻自上而隕之象也武后垂拱二年九月己巳雍州新豐縣露臺鄉大風雨震電有

山湧出高一十又有池周三百畝池中有龍鳳之形永參之
吳永昌中華州赤水南岸大山晝日忽風皆有聲隱隱如
雷頃之漸移東數百步壑赤水壓張村民三十餘家高二百
餘丈水深三十丈坡上草木宛然

明皇開元十七年四月乙亥大風震電藍田山摧裂百餘步畿
內山也

代宗大歷六年四月戊寅藍田西原地陷九年十一月戊戌
同州夏陽有山從於河上聲如雷十三年彬州黃岑山摧
壓死者數百人

德宗建中初魏州魏縣西四十里地數畝忽長崇數尺二年

霍山裂

憲宗元和八年五月丁丑大隄山摧十五年七月丁未苑中

土山摧壓死二十人

僖宗光啓三年四月維州山崩累日不止塵坐亘天壅江水逆流

後唐明宗長興三年七月夔州奏赤甲山崩

宋太宗雍熙三年階州福清縣青龍峽山地壅白江水逆流高十丈許壞民田數百里淳化三年五月雅州名山縣大風雨登遼山地壅江水逆流入民田壞稼

真宗咸平元年七月庚午寧化軍汾水漲壞北水門山石摧圯

軍士有壓死者 二年七月庚寅陝州靈寶縣暴雨崖圯壓
居民死者二十二戶 三年三月辛丑夜秦州大澤縣三陽
寨大雨崖摧壓死者六十二人 四年正月秦州成紀縣山
摧壓死六十餘人 景德四年七月秦州成紀縣崖圯殺居
民 天禧五年五月襄州鳳林鎮道側湧起高三尺許長三
丈闊八尺知州夏竦以聞

神宗熙寧元年潭州益陽縣雷震山裂出朱 二年十月庚戌

南郊東轅門內地陷有天寶十二年古墓 五月^祥九月丙寅

華州少華山前阜頭峰越八盤嶺及谷摧陷於石于坡東西

五里南北十里潰散墳裂涌起堆阜各高數丈長若堤岸至
陷居六社凡數百戶林木廬舍亦無存者並山之民言數年
以來峰上常有聲是夜初昏略無風雨山上忽霧起有聲漸
大地遂震動不及食頃而山摧元豐八年二月甲戌賓州

嶺方縣地陷

啓宗元祐元年十二月華州鄭縣界小敷谷山顛傷居民

徽宗宣和七年七月己亥熙河路地震有裂數十丈者蘭州尤
甚陷數百家倉庫俱沒

高宗紹興十二年十二月陝西不雨五穀焦枯涇渭瀕涇皆竭
光宗紹熙四年秋南岳祝融峰有山自撲如門闕山摧五年
十二月臨安府南高峰有山自摧

寧宗慶元二年六月辛未台州黃岩縣大雨水有山自從五十
里餘聲如雷草木塚墓皆如初而故址為淵潭時臨海縣清
潭山亦自移嘉泰二年七月丁未閩建安縣山摧民廬之
壓者六十餘家嘉定六年六月丙子浙淳安縣長樂鄉山
摧水湧近水殄土也八年五月行都久不雨百川皆竭淮
甸亦如之